



Në mbështetje të nenit 5, paragrafi 1, nënparagrafi 1.1, pika 1.1.1, nenit 12 paragrafi 1, nënparagrafi 1.5 dhe nenit 22, paragrafi 3, të Ligjit Nr.08/L-017 për Agjencinë për Parandalimin e Korrupsionit, nenit 21 paragrafi 2 të Ligjit nr. 06/L-011, për Parandalimin e Konfliktit të Interesit në Ushtrimin e Funkcionit Publik, neni 11, paragrafi 4, i Rregullores Nr. 03/2023 për Procedurat për Hetimet Administrative në Agjencinë për Parandalimin e Korrupsionit, Drejtori i Agjencisë për Parandalimin e Korrupsionit, me datë 19.01.2026, nxjerrë këtë:

V E N D I M

- I. Mbyllet rasti me numër të referencës: EGHVQY-0285, për zyrtarin Vigan Maka, Zyrtar i Lartë i Prokurimit në Komunën e Kamenicës, për shkak se në rastin konkret nuk është konstatuar situatë konfliktit të interesit përkatësisht papajtueshmërisë me ushtrimin e funksionit publik sipas dispozitave të Ligjit për Parandalimin e Konfliktit të Interesit.
- II. Ky vendim është përfundimtar në procedurën administrative dhe i njëjti publikohet në uebfaqen zyrtare të Agjencisë për Parandalimin e Korrupsionit.

A r s y e t i m

I. Rasti i hapur nën dyshimin për situatë të mundshme të Konfliktit të Interesit, respektivisht papajtueshmëri me ushtrimin e funksionit publik për zyrtarin Vigan Maka, Zyrtar i Lartë i Prokurimit në Komunën e Kamenicës, është trajtuar sipas procedurës së paraparë me Ligjin Nr. 06/L-011, për Parandalimin e Konfliktit të Interesit në Ushtrimin e Funkcionit Publik (në vijim: Ligji për Parandalimin e Konfliktit të Interesit).

Ky rast ka filluar të trajtohet pas informatës së pranuar nga jashtë nga një raportues anonim (në vijim: raportuesi i rastit), me pretendimet se (citojmë nga kërkesa): “[...]Ky zyrtar i lartë ka një biznes të vetin për dhënie me qira të veturave. [...]”.

Agjencia për Parandalimin e Korrupsionit, ka zhvilluar procedurën e hetimit administrativ duke ndërmarrë veprimet e nevojshme verifikuese lidhur me pretendimet e raportuesit të rastit, përfshirë shqyrtimin e të dhënave relevante mbi pozitën publike të zyrtarit Vigan Maka dhe angazhimet e tij në biznes privat. Në kuadër të kësaj procedure, me qëllim të sqarimit të plotë të rrethanave të rastit, është kontaktuar zyrtari në fjalë, me ç’ rast i njëjti është njoftuar me pretendimet e raportuesit, si dhe informatat që posedon Agjencia lidhur me këtë rast.

Nga verifikimet e kryera, është konstatuar se zyrtari Vigan Maka, Zyrtar i Lartë i Prokurimit në Komunën e Kamenicës, rezulton të jetë si përfaqësues i autorizuar në bizneset: “ M.R.” SH.P.K dhe “R.C.V” SH.P.K.

Andaj nga kjo rrethanë janë ndërmarr veprime për vlerësimin e pajtueshmërive lidhur me ushtrimin e funksionit publik sipas nenin 13, paragrafi 1, të Ligjit për Parandalimin e Konfliktit të Interesit, ku është përcaktuar se:

“Zyrtari i lartë nuk mund të jetë menaxher, përfaqësues i autorizuar ose anëtar i ndonjë organi menaxhues apo mbikëqyrës i personave juridikë privatë, fitimprurës sipas ligjit përkatës për shoqëritë tregtare dhe organizatave joqeveritare, përjashtuar subjektet e përcaktuara në nenin 14 të këtij ligji, subjektet politike si dhe rastet kur një funksion i tillë i dedikohet me ligj për shkak të funksionit”.

Por, pas verifikimit të kryer nga Departamenti për Kontrollin e Pasurisë dhe Dhuratave në Agjencinë për Parandalimin e Konfliktit të Interesit, është vlerësuar se zyrtari në fjalë nuk ka statusin e zyrtarit të lartë publik, në kuptim të nenit 4 të Ligjit përkatës për Deklarimin, Prejardhjen dhe Kontrollin e Pasurisë dhe të Dhuratave.

Prandaj, fakti se zyrtari në fjalë nuk hyn në kategorinë e zyrtarëve të lartë publik, sipas nenit 4 të Ligjit përkatës për Deklarimin, Prejardhjen dhe Kontrollin e Pasurisë dhe të Dhuratave, kufizimet dhe papajtueshmëritë në ushtrimin e funksionit publik, të parashikuara për këtë kategori zyrtarësh, nuk vlejnë në rastin konkret.

Megjithatë, me nenin 11 [Punët e ndaluara për zyrtarin] të Ligjit për Parandalimin e Konfliktit të Interesit janë përcaktuar disa ndalesa dhe/ose kufizime të cilat duhet të merren parasysh me rastin e angazhimit të këtyre zyrtarëve në biznese private. Kësisoj, dispozita e nenit 11 të Ligjit për Parandalimin e Konfliktit të Interesit përcakton se:

“1. Zyrtarit i ndalohet që të kryejë punë të tjera nëse:

1.1. **mund** të keqpërdorë informacionin zyrtar për interesa private;

1.2. punët e tilla **mund** të ndikojnë në paanshmërinë e ushtrimit të detyrës publike dhe cenojnë respektimin e parimeve të konkurrencës së lirë;

1.3. angazhime të tilla **mund** të dëmtojnë reputacionin e institucionit; [...]

Gjithsesi, zyrtari duhet pasur gjithnjë parasysh se gjatë ushtrimit të funksionit publik, në rast se paraqitet ndonjë situatë e mundshme e konfliktit ‘rast për rast’ të interesit, ai është i obliguar ta deklaroj atë dhe të tërhiqet nga vendimmarrja në rastin e caktuar, konform nenit 17 të Ligjit për Parandalimin e Konfliktit të Interesit, ku është përcaktuar se:

1. Çdo zyrtar gjatë ushtrimit të funksionit të tij publik, në bazë të njohurive të tij dhe në mirëbesim, detyrohet që të bëjë vetëdeklarimin paraprak, rast për rast, të ekzistencës së interesit të tij privat ose të personave të afërm me të lidhur me vendimmarrjen në një çështje të caktuar, që mund të bëhet shkak për lindjen e një konflikti të interesit dhe të tërhiqet nga kjo vendimmarrje.

Agjencia për Parandalimin e Korrupsionit, pretendimet e raportuesit të rastit i ka trajtuar në kontekst të ndalesave apo kufizimeve të përcaktuara me dispozitat e Ligjit për Parandalimin e Konfliktit të Interesit, të cilat përcaktohen si rrethana që mund të shkaktojnë situata të konfliktit të interesit apo papajtueshmëri me ushtrimin e funksionit publik.

II. Agjencia vendosi si në pikën II. të dispozitivit të këtij vendimi, duke u bazuar në nenin 22 [Procedura administrative e Agjencisë për rastet e konfliktit të interesit], paragrafi 12 të Ligjit për Parandalimin e Konfliktit të Interesit, me të cilin është përcaktuar se: “Të gjitha vendimet që i nxjerr Agjencia lidhur me konfliktin e interesit në ushtrimin e funksionit publik dhe shkeljen e dispozitave të këtij ligji, përfshirë veprimet e ndaluara ose të kufizuara në ushtrimin e funksionit publik, ushtrimin e veprimtarive të tjera, papajtueshmëritë në ushtrimin e funksionit publik, duhet të respektohen nga zyrtarët dhe institucionet përgjegjëse. Ato bëhen publike në

faqen zyrtare të internetit të Agjencisë.”, si dhe paragrafin 15 të këtij neni, me të cilin është përcaktuar se: “Vendimet e Agjencisë në lidhje me konfliktin e interesit janë përfundimtare në procedurë administrative.”

Nga sa u tha më lartë, u vendos si në dispozitiv të këtij vendimi.

KËSHILLA JURIDIKE: Pala e pakënaqur ka të drejtë të inicioj konflikt administrativ në Gjykatën Themelore të Prishtinës, Departamenti për Çështje Administrative, brenda afatit ligjor prej tridhjetë (30) ditësh, nga data e pranimit të këtij vendimi.

Vendimi iu dërgohet:

- Kryetarit të Komunës së Kamenicës
- Zyrtarit publik (subjekt i trajtimit për konflikt të interesit)
- Drejtorit të DPKI-së
- Zyrtares përgjegjëse


Yll Buleshkaj
Drejtor i Agjencisë
për Parandalimin e Korrupsionit